

Asociacioni i Gazetarëve të Kosovës shpall të hapur Konkursin për Çmime Vjetore për Gazetari 2022

Asociacioni i Gazetarëve të Kosovës (AGK), me mbështetjen e Misionit në Kosovë të Organizatës për Siguri dhe Bashkëpunim në Evropë, Bashkimit Evropian në Kosovë, zyrës së UN Women në Kosovë dhe Ambasadës së Republikës Federale të Gjermanisë në Prishtinë, shpall të hapur konkursin për Çmime Vjetore për Gazetari.

Nëpërmjet këtyre çmimeve synojmë të nderojmë gazetarët profesionistë që publikuan storje profesionale në vitin 2022, qoftë në mënyrë të pavarur, qoftë si punonjës të medimeve të ndryshme. Synimi ynë është të vlerësojmë raportimet profesionale mediatike për të inspiruar gazetarët që të vazhdojnë mbulimin e çështjeve të rëndësishme për audiencën.

Fitues të Çmimeve Vjetore të Gazetarisë do të jenë gazetarët dhe kameramanët/fotoreporterët, të cilët, pavarësisht rrethanave të vështira, prodhojnë lajme të cilat kanë ndikim të rëndësishëm në Kosovë.

Gazetarët nga e gjithë Kosova, pa marrë parasysh moshën, gjininë apo përkatësinë etnike ftohen të aplikojnë, storja e të cilëve është publikuar prej 1 janar 2022 deri më 16 nëntor 2022. Formën për aplikim mund ta shkarkoni [në këtë vegëz](#) dhe atë duhet ta dërgoni në adresën elektronike aplikimet@agk-ks.org deri më 30 nëntor 2022.

Gazetarët kanë të drejtë të konkurrojnë me vetëm një storje apo cikël storjesh që trajton të njëjtën temë dhe vetëm në një kategori. Në çdo kategori duhet të përfshihen në garë të paktën tre aplikues në të kundërtën anulohet çmimi në atë kategori.

KATEGORITË E ÇMIMEVE:

1. Gazetari i vitit / Gazetarja e vitit

Ky çmim do t'i ndahet një gazetari/eje të përkushtuar drejtë standardeve më të larta të profesionit, i cili përmes raportimeve përgjatë vitit ka prodhuar lajme që kanë pasur një ndikim pozitiv në Kosovë dhe pavarësisht ambientit të rënduar të të bërit gazetari dhe rreziqeve personale, ka ofruar raportim me cilësi të lartë që edhe formon diskursin publik. Këtu hyjnë gazetarët që vëzhgojnë shpenzimin e parasë publike, shërbejnë si mbikëqyrës të ngjarjeve që formësojnë ndërveprimet midis ekonomisë, politikës, dhe sferave të tjera në Kosovë.

Çmimi shkon për gazetarin më aktiv i cili gjatë vitit 2022 është marrë vazhdimisht me publikimin e storjeve ekskluzive dhe që kanë nxitur debat në opinionin publik. Po ashtu element tejet i rëndësishëm është edhe efekti i arritur pas publikimit të storjes/storjeve.

Gazetarët duhet të nominohen nga redaksia apo mund të vetnominohen. Në të dyja rastet, një letër që arsyeton nominimin për gazetar/e të vitit së bashku me vegëzat e bashkëlidhura të punës së gazetarit/es të nominuar, duhet të dërgohen në adresën elektronike të AGK-së.

Shpërblimi: 1,000 EURO

2. TV Storja më e mirë e vitit

Në këtë kategori do të shpërblehet storja e cila ka pasur ndikimin më të madh gjatë vitit 2022. Temat mund të jenë nga cilido sektorë dhe vlerësohet në bazë të këtyre kritereve: Stili dhe shkathtësia e shkrimit; Vlera e shkrimit dhe ndikimi tek shikuesit në përgjithësi; Qasja unike; Shkalla e vështirësisë dhe sfidat logjistike; Gjithëpërfshirja e storjes; Burimet në dispozicion dhe mjetet e përdorura në mbledhjen e informacionit; Ndikimi në shoqëri; Efekti i arritur pas publikimit të stories; Nxitja e diskutimit publik.

Në këtë kategori pranohen vetëm storjet e publikuara në kanale televizive dhe të gjata deri në 3 minuta.

Shpërblimi: 700 EURO

3. Web Storja më e mirë e vitit

Storjet, qoftë videostorje apo të shkruara, të cilat janë të publikuara në websites dhe jo në media tradicionale, janë qasje alternative e raportimit dhe ndikimi i tyre është gjithashtu i rëndësishëm duke marrë në konsideratë orientimin e gjeneratave të reja drejtë informacioneve të ofruara në platformat online. Për këtë arsye, me një çmim vjetor të gazetarisë do të vlerësohet edhe storja apo seritë e storjeve të përqendruara në një temë në bazë të rëndësisë së saj, mënyrës së trajtimit të çështjes dhe ndikimit që ka pasur.

Do të shpërblehet një storje e cila ka pasur ndikimin më të madh gjatë vitit 2022. Temat mund të jenë nga cilido sektorë dhe vlerësohet në bazë të këtyre kritereve: Stili dhe shkathtësia e shkrimit; Vlera e shkrimit dhe ndikimi tek lexuesit / dëgjuesit në përgjithësi; Qasja unike; Shkalla e vështirësisë dhe sfidat logjistike; Gjithëpërfshirja e artikullit; Burimet në dispozicion dhe mjetet e përdorura në mbledhjen e informacionit; Ndikimi në shoqëri; Efekti i arritur pas publikimit të stories; Nxitja e diskutimit publik.

Në këtë kategori pranohen:

- videostorjet e publikuara në media online, jo më gjata se 3 minuta;
- storjet e shkruara të publikuara në media online.

Shpërblimi: 700 EURO

4. Kameramani më i mirë i vitit / Kameramanja më e mirë e vitit

Roli i kameramanit/es kërkon aftësi të rëndësishme si përfshirja e pamjeve të përshtatura me kujdes dhe kreativiteti, aftësia për të zgjedhur lente të përshtatshme për kamerën si dhe aftësia për të komunikuar me gazetarin gjatë realizimit të një storje. Duke konsideruar këtë si një aspekt të rëndësishëm, AGK do t'i ndajë çmim një kameramani/e që ka demonstruar profesionalizëm në pamje kreative dhe mjeshtëri të kompozimit dhe ndriçimit.

Kameramani/ja duhet të përzgjedh një storje ose përmbledhje storjesh me pamjet më të mira që ka realizuar dhe formën e aplikimit ta dërgoj në adresën elektronike të AGK-së. Storja duhet të jetë e publikuar në TV apo media online.

Shpërblimi: 700 EURO

5. Çmimi i gazetarisë për fuqizimin e gruas

Ky çmim për qëllim ka nderimin e raportimit rreth rolit të grave në ndërtimin e paqes, jetën politike, avancimin e të drejtave të njeriut, zhvillimin ekonomik dhe social, me ç' rast synohet vetëdijesimi për rëndësinë e barazisë gjinore dhe fuqizimit të grave dhe pjesëmarrjen e tyre në proceset demokratike dhe zhvillimore.

Për përzgjedhjen e fituesve në këtë kategori, do të merren parasysh kriteret: Rëndësia e temës për fuqizimin e grave; Cilësia gazetareske përfshirë objektivitetin, analizën kritike, kuptimin dhe qasjen etike në trajtimin e temës; kreativiteti dhe stili, përfshirja dhe respektimi i diversitetit si përpjekjet për të siguruar përfaqësimin e etnive, zërave dhe ideve të ndryshme në Kosovë.

Storjet në këtë kategori mund të jenë:

- videostorje/emisione televizive
- videostorje të publikuara në media online,
- web storje të shkruara.

Shpërblimi: 700 EURO

6. Storja më e mirë nga sporti

Në këtë kategori e cila përfaqëson një çmim të ri për gazetarët sportivë në Kosovë, do të shpërblehet një storje që demonstroi standardet më të larta të gazetarisë, por edhe shënon një përpjekje për të investuar në gazetarinë sportive, dhe për të mbrojtur integritetin e profesionit.

Storjet në këtë kategori mund të jenë:

- videostorje televizive
- videostorje të publikuara në media online
- web storje të shkruara.

Shpërblimi: 700 EURO

VLERËSIMI

Vlerësimi dhe përzgjedhja e fituesve do të bëhet nga juria e përbërë nga pesë anëtarë profesionistë. Procesi i përzgjedhjes do të bëhet me poentim nën masa konfidenciale dhe të transparencës etike, dhe do të mbikëqyret nga AGK-ja.

Anëtarët e jurisë do të jenë profesionistë që kanë njohuri të gjera mbi zhvillimet në Kosovë. Ata do t'i përzgjedhin storjet fituese që i përmbushin më së miri kriteret, bazuar në kushtet e mësipërme të pranueshmërisë për secilën kategori të çmimeve.

Fituesit do të shpallen në ceremoninë e ndarjes së çmimeve, që do të mbahet në Prishtinë më 7 dhjetor 2022.